

Petrosay Domi Kágad

Petrosay Domi Kágad

© 2019 Wycliffe Bible Translators, Inc.

Gón Báibalay rajánk kanókén thimay komakká

[Creative Commons Attribution-NonCommercial-NoDerivatives 4.0 International License](#)

Petrosay Domi Kágad

Drud

1 ¹ Cha Issá Masihay hezmatkár o kásed, Shamen Petrosay némagá,
pa hamáyán ke cha may Hodá o rakkénök Issá Masihay páki o nékiá, hamá paymén bébaháén
báwaré rasetagesh ke márá rasetag.

² Shomá ke Hodá o may Hodáwand Issáyá pajjáha kárét, cha áiay zánagá shomay sará rahmat o
sohl o ásudagi gésh o géshter bát.

Báwarmandi zend

³ Áiá gón wati Hodái wák o kodratá, márá har zalurién chizz pa anchén zendéá dáttag ke Hodáyá
pasond ent. É chizza márá cha hamáiy pajjáh áragá rasetag ke gón wati néki o shán o shawkatá
márá gwánki jatag. ⁴ Hamé paymá, márá cha é chizzán wati bébahá o sakkén mazanén kawl o
wádahi dáttag tán gón Hodái zátá sharikdár bebét o cha hamá tabáhiá berakkét ke donyáyá hastent
o sellén wáhagáni bar o samar ent.

⁵ Paméshká wati wasá johd bekanét ke gón sharkeriá wati báwará mohr o mohkam bekanét o
hamé paymá: gón zántá wati sharkeriá, ⁶ gón shehm o rahdáriá wati zántá, gón sabr o ópárá wati
shehm o rahdáriá, gón Hodádostíá wati sabr o ópárá, ⁷ gón á dega báwarmandáni dóst dáragá wati
Hodádostíá mohr bekanét o gón sajjahén mardománi dóst dáragá pa báwarmandán wati mehrá
mohkam bekanét. ⁸ Parchá ke agan shomay nyámá hamé chizza bebant o berodant, gorhá cha may
Hodáwand Issá Masihay zánag o pajjáh áragá báasar o bésamara nabéti. ⁹ Bale agan kaséá é sharri
mabant, allamá kamdid o kór ent o shamoshti ke cha wati pésarigén gonáhán pálk butag.

¹⁰ Paméshká, oo mani brátán!^a Wati sajjahén johdá bekanét tán é gwánk janag o gechén bayagay
tahá mohr bóshtet, chiá ke agan chosh bekanét, hechbar thagala nawaréti. ¹¹ Gorhá pa shomá may
Hodáwand o rakkénökén Issá Masihay abadmánén bádsháhiay darwázag, pa delpachén wasshátkié
pacha bit.

¹² Paméshká man harwahd shomará é habaráni tahtál o hayálá perrénán, bell toré shomá é
habarán wata zánét o é rástiay sará mohr óshtátagét ke shomará rasetag. ¹³ Tánke man wati jesm o
jánay é tambuá^b án, mani hayálá sharter hamesh ent ke é chizzán shomay yátá byáran o tahtál
bedayán, ¹⁴ chiá ke zánán kammén wahdá rand é tambuá roksata kanán. Hodáwandén Issá Masihá
maná cha é habará sahig kortag. ¹⁵ Wati wasá johda kanán ke mani marká rand ham, har wahdá é
chizzání hayálá bekapét.

Chamdistén sháhedi

¹⁶ Wahdé má Hodáwandén Issá Masihay zór o kodrat o áiay per tarragay bárawá habara kort,
pa chálaki jórh kortagén kessaháni randgiriá naatén, má gón wati jenday chammán áiay shán o
shawkat distagat, ¹⁷ á wahdá ke Hodáén Petá Issá shán o sharap dát. Porshawkatén tawáré pa
Issáyá átk o gwashti: “É mani dóstén bacch ent, man cha eshiá báz wassh o razá án.” ¹⁸ É tawár ke
cha ásmáná átk, má hamá wahdá wat eshkot ke gón áiá pákén kóhay sará atén.

¹⁹ Anchosh márá nabiáni pakkáén habar ham hastent, sakk sharr ent ke áiay némagá delgósh
bekanét, cherágéay paymá ent ke teháriá drapshit, tán hamá wahdá ke róch bebit o bámay estár
shomay deláni tahá sar bekasshit. ²⁰ Masterén habar esh ent ke bezánét Pákén Ketabay hech
péshgoí, nabiáni jenday máná kortagén naent ²¹ chiá ke péshgoí cha Ensánay erádah o wáhagá
dhann ent, Pákén Ruh mardománi delá neshtag tán cha Hodáy némagá habar bekanant.

Drögén nabi o áyáni sezá

2 ¹ Bale mardománi nyámá drögén nabi ham hastat, hamá dábá ke shomay nyámá drögén ostád
wadia bant ke chérandari bérán kanókén báwarán rawája dayant, tantaná wati Hodáwandá
ham namannant ke gón wati hóná pa bahái zortant. Á gón tézén gár o bégwáhiéa dochára kapant.

^a1:10 “Brátay” máná har báwarmand ent, mardén o janén.

^b1:13 Tambu, bezán haymah.

² Bázéné esháni badkáriáni randgiriá kant o rástiy ráh, é ostádáni sawabá kalág gerag o béhormat kanaga bit. ³ É ostád, wati tamah o jópaháni háterá gón habaráni chál o prébá shomárá polant. Bázén wahdé bit ke áyáni sará mayárbáriay shawr borrag butag. É shawr purah kanaga bit o áyáni tabáhi wábé naent.

⁴ Hodá tantaná cha hamá préshtagán sar nagwast ke gonáhesh kort o tahtarunay^c tahárterén tahárkiá band o zamzili kortant tán dádrasiay róch berasit. ⁵ Cha kwañén jaháni ham sar nagwast o Hodánábáwaráni donyáay sará tuppáni áwort o tahná Nuh ke rásti o pahrézkáriay jár janók at, gón hapt kasá rakkénti. ⁶ Hodáyá, Sodium o Gomurahay shahr ham sótk o por kort o cha zemináy sará gár kortant, tán pa Hodánábáwarán dars o ebráteb bebant o ⁷ pahrézkáren Lut ke cha násharén mardománi selli o badkárián sakk delranj at, rakkénti ⁸ (parchá ke á nék o pahrézkáren mardá hamáyáni nyámá zenda gwázént o Lutay pahrézkáren ruh, har róch cha á násharén kárán sakk padarda but ke Lut gendag o eshkonág atesh). ⁹ Gorhá hamé paymá Hodáwandá zánt ke wati pahrézkáren mardomán chón cha chakkásán berakkénit o badkárán sezá bedant tán hamá wahdá ke dádrasiay róch berasit. ¹⁰ Hodáy kahr o sezá hás hamá mardománi sará kapit ke wati jesmay maháresh sell o nápkén wáhagáni tahá yalah kortag o hech wák o kodratá namannant o mána nayárant. Haminchok tamard o porkebr ant ke cha ásmáni zórmandáni sobakk kanagá torsesh nést. ¹¹ Bale préshtag ke cha é zórmandán zórákter ant, angat Hodáwanday bárgáhá eshán sobakk o béezzata nakanant.

¹² É mardom násarpad o békobánén jánwáráni paymá ant. Hamá kárána kanant ke áyáni sarehsa^d gwashit o tahná pa gerag o koshagá péda butagant. Hamá káráni sará maskará o rishkanda kanant ke sarpadesha nabant o jánwáráni paymá gár o bégwáha bant. ¹³ Wati gandahén káráni sezá o padmozzesa rasit. Áyáni shádahi hamesh ent ke róchay rozhnáíá mast o hanósh bebant. Gón shomá hór warák waragay wahdá, á wati aysh o nosháni tahá gark ant o é pa shomá bannámi o pólengé bit. ¹⁴ Gón nápkán o zenahkárén chammán, hechbar cha gonáhá séra nabant o sost o nezórén mardomán pa mandr o repk wati dámá perrént. É mardom tamah o lálechá balad o zántkár ant, nálat butagén ant. ¹⁵ Cha rástén ráhá dar shotag o cha Bahuray chokk Balyámay ráhay randgiriá gomráh butagant ke wati sellén káray mozzi dóst at. ¹⁶ Bale áiyá békobánén har, ensáni tawárá harbará lagget o Balyámi áiyá gonáhay sará sarzanesh kort o á nabii cha ganóki kanagá dásht.

¹⁷ É paymén mardom hoshetagén chammag o anchén báp o horm ant ke tuppán áyán har némagá bárt. Tahárterén tahárkiá áyáni ásar o ákebat ent. ¹⁸ É, batháka janant o habaresh puch o hálíg ant. Hamá mardomán gón jesmi badén wáhagán préba dayant o wati dámá perrént ke nóki cha radkárani dastá rakketagant. ¹⁹ Áyán ázátiay kawl o wádaha dayant bale wat selkáriay golám o bandig ant. Chiá ke harkas chizzéá wati wájah o mastera kant, wat áiyá golám o bandiga bit. ²⁰ Har wahdé ke mardom gón may Hodáwand o rakkénók Issá Masihay zánag o pajjáragá cha é donyáay selkáriána rakkant, bale cha rakkagá rand padá hamá selkáriáni tóká bekapant, randi hálesh cha pésarigéna ham gantera bit. ²¹ Agan é mardomán cha páki o pahrézkáriay ráhá hech mazántén, pa áyán gehter at cha eshiá ke zánagá o rand, cha é Pákén hokmá bebajjant ke áyáni sepordah kanag butag. ²² É batal áyáni bárawá chón wassha gwashit ke:

"Kochak wati shántagénáni kerrá pera tarrit." ^e

o

"Shoshtagén hukk padá pujgeláni^f tahá létha wárt."

Hodáwanday róch

3 ¹ Oo dordánagán! É nun domi kágad ent ke pa shomá nebisagá án. Har doén kágadon pa é sawabá nebeshtant tán shomay delá sharrén pegr o hayáláni hobb o wáhagá péda bekanán o shomárá tahtál bedayán ² ke hamá habarán wati yátá byárét ke gwastagén zamánagán, péshigén pákén nabián gwashtagant o anchosh ham may Hodáwand o rakkénókay hokmá shomay hayálá byárán ke áiyá kásedán shomárá dátág.

³ Cha har chizzá pésar bezánét ke áheri zamánagán, é paymén maskará o rishkand kanók jáha janant ke wati sell o badén wáhagáni randgir ant. ⁴ Gwashant: "Gorhá áiyá áyagay wádah chón

^c:4 Tahtarun, bezán jahannam, dózah.

^d:12 Saresht, bezán báten, fetrat, jawhar.

^e:22 Solaymánay Bataláni Ketáb 26:11.

^f:22 Pujgel, bezán puglich, pussetagén gel.

but? Cha hamá wahdá ke may pet o pirén mortagant, har chizz hamá paymá ent ke cha jahánay jór bayagay wahdá butag." ⁵ É paymá pa zánt, wati chammán cha é rástiá banda kanant ke ásmán, Hodáyay habaray sará, cha dérigén wahdán hastat o é zemin, cha ápá o ápay ráhá jór butag o ⁶ cha hamé ápá á zamánagay donyá boddhet o gár o bégwáh but. ⁷ Cha hamá hokm o habará ham sajjahén ásmán o é zemin, pa ásá gechén kanag butag o tán dádrasiay róch o nábáwarén mardománi tabáhi o zawl bayagá dárág butagant.

⁸ Bale, oo dordánagán! Cha é habará békayal mabéti ke pa Hodáwandá yak róché, hazár sály paymá ent o hazár sál, yak róchéay paymá. ⁹ Lahtén mardom gománá kant o gwashit ke Hodáwandá wati per tarrag o áyagay kawl o wádah mahtal dáshtag, bale chosh naent. Rástén habar esh ent ke Hodáwand gón shomá sabr o ópára kant, wahd o móha dant tán gonahkár pashómán bebant, chiá ke nalóthit kassé gár o bégwáh bebit. ¹⁰ Bale Hodáwanday róch allamá kayt. Chosh ke dozzé anágata kayt o sajjahén jáha serrénit. Á róchá ásmán gón torsnákén tawár o bustagé gár o bégwáhá bit, estár o máh o róch o harché ke ásmáná hast, ásá kapit o ápa bit o zemin o harché ke zeminá hast sochit o pora bit.

¹¹ Nun ke zánét harché may chágérdá hast gár o zawl bayagi ent, gorhá báyad ent shomay zend pák o palgár bebit o pa Hodádostí begwazit. ¹² Hodáy róchay entezár o wadárá ham bebét o johd bekanét ke á róch zutter berasit, hamá róch ke ásmána sochit o ápa bit o estár o máh o róch o harché ke ásmáná hast ásá kapant o ápa bant. ¹³ Bale má nökén ásmán o zeminay entezár o wadárá én ke áyáni tahá adl o rásti hákema bit. Chiá ke é Hodáy labz o wádah ent.

Goddhi habar

¹⁴ Oo dordánagán! Nun ke é chizzáni wadárá ét, johd kanét á shomárá pák o béayb o gón wat pa sohl o árámiá wadi bekant o begendit. ¹⁵ É habará ham mashamoshét ke may Hodáwanday sabr o ópáray maksad rakkénag ent, anchosh ke may dordánagén brát Pulosá gón Hodábakshetagén hekmáti pa shomá nebeshtag. ¹⁶ Wati sajjahén kágadáni tahá hamé bárawá nebisit. Á kágadáni lahtén habaráni zánag o dar barag grán ent o násarpad o nezórén mardom á nebeshtahán wati tabá chahra dayant o pa radi mána kanant, bale é mardom wat zawaála bant. Gón Pákén Ketábay á dega nebeshtahán ham hamé kárá kanant.

¹⁷ Paméshká, oo dordánagán! Nun ke shomá é sajjahén chizzán cha pésará zánét, pahréz kanéti tán radkár o násharén mardom shomárá wati gomráhiai némagá mabarant o shomá wati mohr o mohkamén zendá mabáhénét. ¹⁸ May Hodáwand o rakkénók Issá Masihay rahmat o zántá rodóm gerán bebét. Shán o shawkat annun tán abad, hamáiá berasát. Anchosh bát, ámin!